

Tal imprest metût adun dal Archivi di Stât di Udin cul jutori de Universitât dal Friûl

La ricercje des nestrîs lidrîs

Un sisteme informatic al permet di cjatâ i nons dai vons

*Il Guvier di Rome
al à garantît poie
e contribûts de 482*

Friulinprin, un imprest tecnologic par lâ ae fonde des nestrîs lidrîs, par scuvierzi la anagrafe storiche des fameis furlanis.

Chest progjet al è stât inmaneât dal Archivi di Stât di Udin, direzût di Roberta Corbellini, par valorizâ la storie de int di chenti e i son stâts ricognossûts i finanziaments de leç 482/99 diretementi di Rome, de Presidence dal Consei dai Ministris.

La realizazion e à cjàpât dentri pe part tecniche il Dipartiment di Siencis Statistichis de Universitât di Udin cul compit di studiâ la structure dal sisteme, meti a pont lis metodologiis di trascrizion dai dâts, provâ il model, formâ i operadôrs par meti dentri i dâts, coordenâ la realizazion e fâ il control di cualitât dai dâts.



"Friulinprin", la anagrafe storiche dai furlans nassûts tra il 1850 e il 1900. Si puedin cjatâ ancje mistîrs, sorenons, lûcs e agns di nassite

In struc, *Friulinprin* - il sit al è www.friulinprin.beniculturali.it - e je une bancje di dâts che e tire dongje i documents anagrafics, ju met insiemit e e ricognòs i fats plui impuartants inte biografie des gjenerazions di furlans de Provincie di Udin che a son vivûts tra il 1850 e il 1900. Lis fonts scandaiadis par meti adun cheste anagrafe storiche a son i

certificâts di matrimoni e i documents di leve militâr, che a son stâts gjavâts fûr dopo di une lungje fase di studis di bande di archiviscj, informatics e esperts di demografie. Cheste documentazion e je di fat considerade la plui adate ae costruzion di largjis rêts di informazion. Di fat, par ogni persone, i ats a riferissin no dome il non, il cognon, la etât, date

e lûc dal event, ma ancje il non dal pari e de mari, il sorenon, il mistîr e di altris elements che insieme a judin a disegná - ancje se plui o mancul - un profil biografic di ognidun.

Chest imprest al è duncje une fonde bieles e une vore utile par scomençâ a cîri fûr il propri arbul gjenealogic e un interessant jutori pai studiôs che a vuelin fâ ricercjis di nivel plui avanzât: par esempli cun *Friulinprin* si pues viodi cemût che un cognon al à vût di jessi mudât tal cors dal timp (e dai ufiziâi de anagrafe talians), comparâ i sorenons dai diviers puecscj, e vie indenant.

Ma la vore e je pene scomençade. Di fat, i progjets a varessin di jessi slargjâts cjàpant dentri sedi i prins agns dal Nûfcent (dome fin al 1920 par cuistions di ... privacy), par cjàpâ dentri almancul cuatri gjenerazions vivudis intun moment storic, tra Votcent e Nûfcent, di particolar significât pes trasformazions demografichis e sociâls.

E al sarès une vore preseabil se chest progjet, che cumò al cuvierç il teritori des atuâls provinciis di Udin e di Pordenon, al podès jessi slargjât ancje ae provincie di Gurize, che in ché volte e jere sot de Austrie.

Cheste bieles pensade e mutive ancje che i progjets par prudelâ lis minorancis linguistichis, previodûts de leç 482 che e à finanziât ancje *Friulinprin*, a puedin jessi metûts in vore no dome par pandi la cognossince de lenghe furlane, ma ancje de culture di chenti o ben, come in chest câs, des nestrîs lidrîs.